



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir\_yimyim

tir yimyim TAPAK 8

Kiralongrartem ya Pak sepaitem indang hadir: Ravi Shankar Prasad

Club World Cup nung Ronaldo masayatsü



VOL. XXII ISSUE NO. 234 (ADOK 234) DIMAPUR AMUNGNÜ (SUNDAY) AAMI (JUNE) 08, 2025 ₹ 5.00

## MGNREGA nung aruba sen ya nübur meyong: Phevima VC

**Dimapur, Aami/June 07 (TYO):** Rural Development Department ajanga Mahatma Gandhi National Rural Employment Guarantee Act (MGNREGA) kübok financial year 2024-25 atema wage component shilem 30 meshiba Phevima (Kacharigaon) Village Council-i meyipa agütsütsü memulunger.

Yimtsüng nung lokti senden ka amendang iba deduction anema nokdaksü telemtetba agi aser iba pangzüng department nem agütsüogo, ta council chairman ajanga metetdaksü.

Ministry of Rural Development (MoRD) ajanga beneficiary bank accounts nung wage component ya indang-indanga inoktsü tenzükogo. Yamaji süaka department-i village council dang beneficiary shia nungi sen shilem 30 meshia department nem meyiptsütsü totuyuba agüja arur, ta pai ashi.

Council-i wage cut shilem 30 aser material deduction shilem 50 meyiptsütsü memulung. Parnoki sorkar dang yimdaklir indang sen agiba anentsü ajungshi aser danga yimtsüngtem dang parnok ama nokdaksü ayongzüka liasü.

## Dimapur Railway station ken o tekeraba nung bentettsüla: NCD

**Dimapur, Aami/June 07 (TYO):** Ali agiloka aoba ajanga Dimapur Railway station world-class station kuma yanglutsüba maparen meinyakteti anendaka aliba atema ali kiburtem den iba tebilemsü tekeratiba nung bentetang, ta Naga Council Dimapur (NCD) ajanga state sorkar dang ajungshia liasü.

NCD ajanga sangdong ka nung sorkar dang shisadokden senden amentsü nenshia ashi aser ali kiburtem dang bendanga agütsüba tanüla nung inyaksangshitsü ayongzüka liasü.

Nagaland sorkar aser ali kiburtem tsungta tangatetep tajung kati marutetba tebilemsü NCD ajanga lemsatetpa liasü.

## CM-i nangzükba ama KPC asoshi ki yanglutsütsü teimla mesamai lir

**Kohima, Aami/June 07 (TYO):** Kohima Press Club (KPC) tir Alice Yhoshü-i anir züngsemtem June 7, 2025 anepdang New Secretariat area, Kohima nung KPC kimong nung adenshia mürekteta liasü. State yimtiba nung KPC ya January 2026 nung küm 25 ajungba benjong amungtsü renemshiba mapang parnok atema teti asoshi ki ka nungdakba jangjadakja iba sentong ya ayongzüik.

Nagaland Chief Minister, Dr. Neiphiu Rio-i February 27, 2024 nü osangbener senden ka nung jembidang, teti asoshi Kohima Press Club building ka küm ka tsungta renemtsütsü sangdonga liasü.

Chief Minister-i iba otsütsütsü osang sangdonger küm ka ser ita asem aruaka tang tashi iba ki atema nungshilong-a mazüngi lir.

KPC tenteter, taoba tir aser tang advisor inyaker Kopelo Krome iba tesemi Honibarnü aru aser India nung danga state tem nung press clubs tem kanga akumtsüboam amshir aser state sorkar temi osangbener asoshi facility balala keta aliba club buildings yanglutsür, ta ashi.

Ajisüaka KPC küm 24 tashi aruyonga tang tashi tesem shidak ka mali, ta pai sasa ashi.

KPC tir Yhoshü-ia, Kohima Press Club ya state yimtiba nung amenoka liaka tang tashi sorkar-i osangbener tem adenshia sensaksemtsü, osangbener senden amentsü mesüra mapa balala inyaksü asoshi teti atema

mesüra khen atema building agüka mali ta ashi.

Tang KPC ya APO Building, Kohima nung sen agütsür tesem ka nungi inyaksangshir, ta lai ashi.

"Sorkar mapa inyaker masü asünungji osangbener atema ki o jen agütsütsü mesüra yanglutsütsü sorkar ozüng nung mali, aser Nagaland nung private sector nunga osangbener ya taa tajemtiba angurtem lir, aser ibai tenla-tenji aser züngsem temi bendenba ajanga maparen balala inyaker," ta lai ashi.

Anungji teti asoshi office clubhouse yanglutsü ya asenok tashi agi makoktsü, anungji state sorkar dang teyari meshitsüsa akumer, ta Yhoshü-i ashi.

Nagaland indang kidanger state tem nung pei state sorkari press clubs nem agütsüba facilities tem amshir, ta lai ashi.

Küm 24 jakdang Kohima nung kasa tangatetba aliba osangbener ishikati KPC ya kumtet aser tangbo züngsem 60 dak tema lir, ta KPC tiri ashi.

State yimtiba nung Media Centre ka ama amshitsüsa aser danga district aser state tem nungi aruba osangbener temia amshitettsüsa ki o jen ka nungdaker.

CM-i nangzükba ama state sorkari Kohima nung teti asoshi press club building ka asangsang nung yanglutsütsü imla atar, ta lai ashi.

Maneni KPC küm 25 ajungba benjongmung ya KPC kimong nung amungtsü, ta laisa ashi.

## Assistant Professor 147 shimba indang sensaksem sentong ayongzüik



Assistant Professor 147 shimba indang sensaksem sentong ayongzüka agiba noksa nung angur.

**Kohima, Aami/June 07 (TYO):** Combined Technical Association of Nagaland (CTAN) aser Nagaland Net Qualified Forum (NNQF) ajanga Honibarnü Angami Women Organisation Hall, Kohima nung 'Public dialogue on 147' sentong ka ayongzüka liasü.

Higher Education Department nung backdoor yimya nung assistant professors 147 shimba indang jembishinüba sentong nungya state indang Higher Education Department nung tawa assistant professors aser librarians 147 shimba dak sendakba tebilemsü balala jembia liasü.

Sorkar mapa nung nübu ochishia aser shidak shimdaksütsü nükjidong nung iba sensaksem ya ayongzüka liasü.

Sentong ayonger temi merit nung ajemdaker shimtsü aser yanglua aliba recruitment norms sülen anidaksü tongtipang lir ta ashi. Iba den stakeholders temi

selection procedures nung mangatetba jangjatsü asoshi sapang agüja liasü.

Iba ken o nung nisung aikati temulung agüja parnok shimba nung criteria aser yimya shidak amshi-mamshi ta asüngdanga liasü.

CTAN aser NNQF ya yakbang sür yimya shidak amshia nübu shimtsü aser sorkar dang tawa shimba tanaben lepa reprangshitsü ajungshia arur.

Nagaland indang higher education sector nung yimya shidak amshia aser merit yimya nung nübu shimdaksütsü asoshi inyaktepba nung shilem ka ama iba sentong ya ayongzüik.

Item tebilemsü lemsateptsü asoshi CTAN aser NNQF ajanga maneni nüburtem nem angatetdakja aser tapet ketdangsür den jembishinü akatsü temulungtetba lemsatetpa liasü.

Sensaksemba mapang, assistant professors 147 shimba ya Article 16 nung aibelenba lir,

kong public appointment nung ajak nem kasa maongka agütsütsü temeden agüja lir, ta CTAN aser NNQF ajanga ashi.

"Tekeratiba nung NPSC ajanga requisition masünungbo asenok ajem-ajema malitsü. Asenoki maneni longkak aitba ajanga parnoki assistant professor 147 shimba totuyuba meyipa agi," ta parnoki ashi.

Iba sentong nung tongti o jembirtem ya peace activist aser Forum for Naga Reconciliation züngsem Niketu Iralu, social activist aser general secretary Kezekevi Thehouba Robert N Solo, GB & social activists Kahuto Chishi aser Nagaland University nung retired professor G T Thong den CTAN conener Meshenlo kath aser Core Committee NNQF member Videkhono Yhokha nungertem liasü.

Sorkari item mapa ya NPSC ajanga requisition masünungbo CTAN aser NNQF ajanga ano longkak aitsüla ta stakeholders temi ashi.

## NDPP-BJP sorkari metemsüba nübu IAS kumdaksütsü meranger: RPP

**Dimapur, Aami/June 07 (TYO):** Rising People's Party ajanga Honibarnü sangdong ka nung NDPP-BJP coalition sorkar dang IAS ya danga backdoor yimya nung meshimtsü ayongzüka liasü.

Rule book ajak jana indokba pongdang nung indoka sorkar ozüng aser yimya ajak akema backdoor yimya nung tapi agi IAS nung induct asüba ya opposition maliba sorkar indang süngjang lir, ta ashi.

Ex-cadre tetetzü state sorkar indang 'temporary/arbitrarily appointed employee' ka lir aser NPSC ama lenmang shidak nungi shimba cadre posts/employees den balala lir. Ex-cadre ya aika backdoor ajanga shimba alitsü akok, anungji CANSSEA,

FONSESA, NSSA, aser NF&ASA ajanga benokba ken o ya kanga tebilemsü tulu lir, ta RPP ajanga ashi.

Küm ishika tejakdang sorkari backdoor ajanga shimba ketdangsür ka IAS nung anioka yimya süba. Iba mapang ola adokba meliasü, kechiaser nüburtemi junga memetet aser iba mapanga opposition maliba sorkar liasü.

Tangbo iba ken o nüburtemi jangja meteta lir asünung RPP-i CANSSEA, FONSESA, NSSA, aser NF&ASA dang iba officer/IAS candidate tenüng temai adoktsütsü mepishir, shiba political establishment-i kanga aginer amai lir.

Tanabuba nung iba candidate ya backdoor yimya nung mapai

aniokba asü masüar jangjatsü ayongzüiker, ta RPP ajanga ashi.

Tang tesüsa mangatetep adoka aliba ya opposition maliba sorkari nüburtem mashi lenmang nung anisaba tatishitsü tajung ka lir.

NDPP-BJP coalition-i miimshia par tasa tamajung inyaksü bilema alitsü, saka iba ken o nung CANSSEA, FONSESA, NSSA, aser NF&ASA ajanga tasü ita nokdakba ya lenmang shidak nung mera tajung agiba lir, ta sangdong ajanga ashi.

RPP-i maneni CANSSEA, FONSESA, NSSA, aser NF&ASA bhukuma nokdaksü aser metemsüba candidates nem system memenendaksütsü, ta ashi.

## Küm asem sülen Forerunners teloki Miss Mokokchung ayonger



Tayonger Forerunners züngsemtem den Miss Mokokchung offline audition nung tetendangertem külemi Hotel El-Dora nung tangokba noksa nung angur. Mokokchung, 07 June, 2025

**Mokokchung, Aami/June 07 (TYO)** Mokokchung nüburtem talisa kongrolartem asoshi osang tajung kaji - 2021 küm "Miss Mokokchung" tetoktepba agiba sülen küm asem mekateti arur, taküm iba sentong asendenshia Forerunners Mokokchung teloki Mokokchung District Art & Culture Council (MDACC) aküm nung ayonga akatsü, ta June 7, 2025 nü yangi Hotel El-Dora nung osangbener senden ka alidang tayongertemi metetdaksüogo. Forerunners teloki tang Miss Mokokchung sentong ayongba ya züngabo tasembenbuba asütsü.

Iba dak sentakba nung tanü El-Dora Hotel nung Miss Mokokchung 2025 offline audition ka agiogo aser taruba hoptaji offline audition nung medentertem asoshi online audition ajanga agütsü maongka lapoktsütsü, aser iba anogoji tayongertemi jilia sangdongtsü aser osang tejangja "forerunnermokokchung" indang instagram nung agütsütsü, ta parnoki shiogo. Tetoktepba nung shilem aginürtemji - Mokokchung nung alir senso asütsüla, tejemba agi tar (height) 5.3 bosa asütsü aser arishi kümji 18-25 tetsüngta pur asütsüla.

Miss Mokokchung shimba sentongji 25th July, 2025 aonung Mokokchung town hall nung akatsü sentong renema lir. Osang tajung kaji - taküm iba dak sentakba nung tetoktepertem nem yimya awashi aser shisalen sayutsü asoshi Kohima nungi mongin kar arutsü, aser shilem agirtem asoshi anisüngzük tulu kaji - sobaliba sobutsü dak alaka tetoktepba aonungji tetoktepertem asoshi Shillong nungi nungtugu designer telok kadi design asüba tolatem asemtsü aser sobutsütemji tayongertemi angati renemtsütsü, ta parnokisa metedaktsü.

Ano jangratemtsü kaji - Miss Mokokchung shimba aonungji tang tebandak Miss Kerala aser Miss Manipur na jaoka lir aser nungtugu artist kari shilem agütsü saka tang agibo itemji shia matar, ta tayonger züngsem kadi ashi. "Küm talangka lir iba sentong ya ayonger asünung taküm ya balaka akatsü renemshidar aser Miss Nagaland tetoktepba nungjia tajungtiba shimer yoktsü onok terenemshiba lir", ta parnokisa shisem.

Taküm iba tetoktepba ya "beyond beauty" omen dak ajemdaker agir aser Miss Mokokchung nung takokertem

den külem sür lokti asoshi inyaktsü bilemba kaji talisa matamabensartem (special education) dak rangloker inyaknür, aser tanur shirnok iba jagi kongshia lir, itempur ajungkettsütsü aser parnokji lokti nung züngoka amshitsü asoshi nüburtem rongnung tangatetba agütsütsü merangba mapatem inyaktsü, ta Forerunner züngsem kadi ashi.

Miss Mokokchung nungja (title) shibai bendir, laji MDACC indang "Ambassador" ka asütsü. Taküm iba sentong balaka asütsü ta asübaji 1992 nungi tenzüka Miss Mokokchung adoker rogo aser Ao tsür rongnung Miss Nagaland adokertemi shilem agütsü, ta parnoki shisem.

Küm asem tashi Miss Mokokchung mayongtetba kuli kar lemsatepdang, Covid-19 ajanga alima mesüngjemi kümdaktsüba dang masü rongsenren nunga langzüngi aluba den tia maka tayongertem maliasü aser tejangjangartema kanga apara liasü, ta MDACC züngsem kadi metetdaksü.

Tanü offline audition nung tetendangertemji - Sashila Nathan, Jentiren Jamir, Sentiwapang aser Imnüksüngla par pezü liasü.

## Mokokchung nung VKSA kübok yimtsüng 67 ayimjemogo

**Dimapur, Aami/June 7 (TYO):** Viksit Krishi Sankalp Abhiyan (VKSA) 2025 ya Mokokchung district nung May 29 nü Deputy Commissioner-i formally amenoktsüogo. Anogo kar nungbo tsüngsang kanga mejungaka taoba anogo ti tsüngda yimtsüng 67 nung aluyimer 6000 den sendaktepa inyakogoo.

District nung team asem lir, kong ICAR nungi scientist, KVK nungi mongintem aser allied department tem nungi ketdangsurtem densema lir aser team shiai anogo ka nung yimtsüng asemsem asemer.

Iba sentong ayongzüka agiba mapang mongintem soil health card dak ajemdaker fertilizer amshiba, acidic soil mitigation, Kharif crops modern agricultural practices, resource conservation aser climate resilient technology tem, natural farming, Integrated Farming System, shiruru metsüba aser anepaluba yimya aser sorkar schemes/policies tem indang tangazükba agütsür.

Yimtsüng semdangba shia yimtsü ajak amai nung sensaksem sentong agir aser iba mapang, tsük, jenjang menjang, mersü, tomato, azüngken, cucurbits aser citrus, titi aser litchi amala süngjang nung tashidaktem aser mesen amala shiruru tilala agi timtem agütsüba indang tebilemstütem benoka sensak sema arudar.

Iba den bendeloksema acidic soil achaayangba yimya, soil health cards koda tongtibang, district nung natural farming atema lenmangtem indanga tangazükba agüja arudar.

Maneni sen talila aazüktsü, yimdak yimtsüngtem nung libaliro jenjang ajungkettsü aser laloshpongba tajemba kümdaktsütsü atema yimdak yimtsüngtem nung anguba aonsotsü aser süngjangtem processing aser value addition indang tetsür aluyimertem nem tangazükba agütsür.

Kiset shiruru dak sendakba nung vaccination mapanglem, African Swine Fever

achaayangba aser Pashu aadhar indang asüngdanga arudar. Iba dak sendakba nung mongintem lendong nungi jenboa alitsü aser temetonshitsü balala indang tangazükba agüja arudar.

VKSA ya linük ajunga nung benoka inyakba aluyimba sentong ka lir, koba Ministry of Agriculture and Farmers Welfare, Govt. of India-i achaayangba. Iba ya 2047 küm tashi nungbo India tangar dak memetaloki alitsü nükjidong aliba nung shilem ka lir.

Iba sentong ya Indian Council of Agricultural Research tawabangba kübok ayongzüko aser 731 Krishi Vigyan Kendras (KVKs), 113 ICAR institutes, 3 Central Agricultural Universities, 63 State Agricultural Universities aser state sorkar allied department temi benoka inyakdar. VKSA nükjidongji 2025 küm June 12 nü tashi nungbo district 700 dak tema nung aluyimer crore 1.5 atongtsü asoshi lir.

## Shamator aser Hoshepu nung consumer awareness sentong agiogo

**Dimapur, Aami/June 7 (TYO):** Consumer Protection Act 2019 dak sendakba nung Consumer Awareness Campaign ya June 6 nü Shamator jila Town Hall nung ayongzüka agiogo.

Iba sentong ya Tuensang District Legal Services Authority-i ayongzüka agia liasü.

Sentong nung Executive Chairman SCCI Z. Atsu-i o tatsüka jembiba. Kundilong Kessen, NJS Secretary, TDLSA-ia Consumer Protection Act 2019 dak ajemdaker jembiba aser iba sülen question and answer session ka agia liasü.

Iba sentong ya Panel Lawyer, TDLSA Shangchiu-i tepela o jembiba sülen tembanga liasü.

Kasa mapang nung Zunheboto District Legal Services Authority (NSLSA tawabangba kübok) aser department of Legal Metrology & Consumer Protection Zunheboto na longjemer

Consumer Protection Act 2019 dak sendakba nung awareness campaign ka agiogo. Iba sentong ya June 7 nü EAC office Hoshepu nung agia liasü.

Sentong agiba mapang Retain Lawyer, ZDLSA, Easter H Yephthomi-i Consumer Protection Act 2019 indang metetdaksü aser Assistant Controller, LMCP Zunheboto Khevishe Z Zhimomi-i Legal Metrology Act & Nagaland LM enforcement Rules indang tangazükba agüja liasü. District & Session Judge Chairman ZDLSA Phuleto Yephtho, NJS-i keynote address lemsatepa liasü.

Sentong nungsa chairman Hoshepu Area Public Organisation K.khushito Awomi, RTD-ia o tatsüka jembiba. Iba sentong nung village Council kübok inyakertem, GB tem, HRPO representative tem aser Arogo tenzükertemi shilem agia liasü.

## Chuchuyimlang Kaketshirtem alima lipukümmung amung



Chuchuyimlang Kaketshirtem Lipukümmung June 05 nü amungba mapang agiba noksa ka yangi angur

**Chuchuyimlang, June 07 (TYO):** Alima linüktem den külemi Chuchuyimlang Kaketshir Telongjemi alima lipukümmung (World Environment Day) anogo nung Community Reserved Forest Committee Chuchuyimlang aser Forest Department Mokokchung den longjemer

alima tzü mopung kumzüka ayutsü nükjidong nung süngdong noklang ana dak tema NH-2 sütaka tema yutsüogo. Iba den

külemi yimti yimdong merüka plastic pongdangtem tem sarutena liasü.

Alima nung terenlok arua lenmangtem yangludang süngdonglidongtem aika samar aser iba melena süngdong tasen adokdaksütsü kanga tim ta angateta iba maparen tenzüka CKT tir Sb. Meyimatsüng ajanga lemsatep. Paise tzü mopung kumzüksü asoshi senso ajaki temulung agüja inyaktsü ayongzüka.

## Pughoboto SDPDB senden menogoo

**Dimapur, Aami/June 7 (TYO):** June ita atema Pughoboto Sub-Divisional Planning and Development Board (SDPDB) senden June 6 nü New Administrative Complex nung menogoo.

Senden ya MLA aser SDPDB Pughoboto mendenbuba Dr. Sukhato A. Sema lenisüba nung agi aser ADC aser Vice Chairman Tiamera Chang-ia lenisüba nung teyari agüja liasü.

Senden ya SMO Pughoboto Dr. Kerekugumle-i sarasademer tenzüka aser Yitachu Thur, EAC Ghathashi-i taoba senden indang minutes tem lepareprangshia liasü.

Senden nung New Foundation School Administrator aser "Go Green Club" ngutetsang Anito Swu-i Carbon Credit Program (CCP) indang metetdaksü. Swu-i, REDD+ (Reducing Emissions from Deforestation and Forest Degradation) inyakyim kübok Carbon Credit Program (CCP) indang metetdaksü. Iba ya

United Nations Framework Convention on Climate Change (UNFCCC) kübok küm 50 nung ajangzüka inyaktsüba sentong ka lir, koba Mirin Climate Centre (MCC) aser Infinite Solution aser local collaborator tem longjemer benoka inyakdar.

Swu-i ashiba agi, REDD + Project yagi Northeast India nung aser talisa Nagaland nung indigenous tribal kin tem nem arem wazüka ayutsü atema maongka agütsüba den carbon credits dena aazükdaksür.

Iba inyakyim nükjidong tongtibangtibaji arem leprepa aoba tajemba kümdaktsütsü, sustainable forestry inyakyim ajungkettsü aser lokti tem carbon credits trade asütsü atema melatsü atema lir aser iba ajanga sustainable economic model ka tentettsü, koba ajanga tzü mopung aser arem shiruru dena wazüka ayutsü. Board-i iba inyakyim ya kanga pelashishia agizükogoo aser iba ya Pughoboto temeket nung eco-conscious terenlok atema model ka ta ashi.

## PELABA LEMSATEPER



**T. Ken 103:13 "Tebui pei chirtem dang aochiba ama, Yamaji KIBUBAI Pa tsüubattem dang aochir."**

Onoki teti meima aliba Obala, asür. **I. Sakulepden Pongen** (Chuchuyimlang) mapang tatsüka shiranga alidang aser pa akümlü tembangba mapang tashi nung sarasadem den külemi lenla balala ajanga onok nungita yarir ajak dang kinüngertemi pelaba lemsateper.

Onok mangyimba mapang nung nenoki temeim sayuba ajanga onok nem tashi tasen agüja onok melung kanga süneptsüogo.

Onok mangyimba mapang nung onok nungita yariba atema kanga pelar aser nenok mapa tajungji onoki teti bilemtetsü. Tsüngremi nenok ajak moajang.

~ Temeim kinungtsü, chirnurtem, semchirtem aser anükapang

## Bihar ya linük nung ozüng alema inyakba yimtiba kümogo: Rahul Gandhi

**New Delhi, June 07 (Agencies):** Bihar nung tzüzüng-ozüng tensa majungba dak sendakba nung Congress party lenir Rahul Gandhi-i Ato kilonser Narendra Modi aser Bihar Chief Minister Nitish Kumar naprongla aitsü.

Modi aser Kumar nati Bihar ya 'shisatsü aliba lima' agi linük nung ozüng alema inyakba yimtiba kümogatsüogo, ta pai aitsü.

Taküm küm tatembanglen Bihar nung assembly election agitsü lia taküm Rahul-i tang agi pongubenbuba Bihar semdangogo.

Hokolbarnü Rajgir kübok

Nalanda nung lokti den jembidang Rahul-i, "Bihar ya mapang ka nungbo ochi, tim temeden agütsüba aser rara maliba lima ka ama züngshia liasü. Alima ajunga dang Bihar-i lenmang sayua liasü. Alima tesem balala nungi nisungtem Nalanda University nung azüngtsü atema aru. Ajisüaka tanübo tensa melenshiogo. Bihar nung alirtem tanga state temi aser bendangleni aotsüsa akümer, kechiyong yangi mapa maongka mali. Tanübo Bihar ya linük nung ozüng alema inyakba yimtiba kümogo," ta ashi.

Rahul Gandhi-isa, "Centre sorkari metetsümonga caste census sendoker. Central sorkari caste census ya shidak magitsü, kechiyong ibaji shidak inyakba anogo nungsa BJP politics anentsü," ta ashi.

Tawa India-Pakistan tsüngda rara dak sendakba nung Ato kilonser Modi aija Rahul-i, "Donald Trump-i 11 ben tashi pai Narendra Modi nem surrender südaktsü ta jembiogo- saka Narendra Modi-i kecha meshiteter, Trump-i yazü jemi ta meshiteter, kechiyong ibaji atangji," ta metetdaksü.



June 07, 2025 nü New Delhi nung Union External Affairs Minister S Jaishankar-i UK Foreign Secretary, David Lammy aser tangartem den senden amendang tangokba noksa nung angur.

## Kiralongrartem ya Pak sepaitem indang hadir: Ravi Shankar Prasad

**Berlin, Aami/June 07 (Agencies):** Honibarnü Germany yimtiba, Berlin nung BJP MP aser Parliamentary telok ka nung lenir, Ravi Shankar Prasad-i, Pakistan nung sepai tongti ketdangsertemi rara ayonger aser India tashi meitdaksütsü atema parnoki kiralongrartem ya hadir ama amshir, ta aitsü.

Germany nung aliba India nungertem den jembidang Ravi Shankar Prasad-i, Ato kilonser Narendra Modi lenisüba kübok Information Technology, Space aser digital tsütsü India tejakleni aoer, ajisüaka Pakistan-i tongbang nung maneni tamakok angur aser kiralongrartem yarir, ta metetdaksü.

"India aser Pakistan na ya kenüyongi dang aso. India tang koba jenjang nung lir aser parnok (Pakistan) koba jenjang nung lir? India ya alima nung IT tsütsü tashi tulu aliba linük ka kümogo aser space tsütsülen-a tashi tulu kümogo. India nung startup movements alimai züngshir. Alima nung mobile phone teimba yangluba linüktem rongnung India tanabuba jenjang nung lir," ta pai metetdaksü.

"Ano külen Pakistan-ibo kiralongra gol dang yanglur. Sepai General tem kübok alima nung kiralongrar tajungtiba

adokdaksütsü atema parnoki inyaker. Parnoki asenok pezüben maakogo aser item tatalokba shia parnoki tamakok angu. Asenoki kodanga tama mamaker; rara tama tenzükertemji parnok lir. Ibaji yimtenren lenirtem masü saka sepai General tem tashi kübok aliba agi lir. General temi parnok metetdaksütsü atema rara aginer aser parnoki kiralongrartem ya hadir ama amshia inyaker. Kiralongrar kar lira iba nisungbaji Pakistan nung mesüra Pakistan nung training agirtem," ta pai ashi.

"2014 küm Ato kilonser Narendra Modi-i, pa Ato kilonser kümra pai India ya IT+IT=IT kümogatsütsü ta jembia liasü; iba tetezü Information Technology + India's Talent = India Tomorrow lir," ta paisa metetdaksü.

Operation Sindoor outreach mission kübok Prasad-i aniba telok nung züngsemtemji BJP MP tem- Daggubati Purandeswari aser Samik Bhattacharya na, Congress MPs- Amar Singh aser Gulam Ali Khatana na, Shiv Sena (UBT) MP Priyanka Chaturvedi, AIADMK MP M Thambidurai aser taoba mapang Union Minister MJ Akbar nung lir.



June 07, 2025 nü Washington D.C nung Congress MP, Shashi Tharoor-i aniba Parliamentary telok nungi züngsemtemi Co-Chair of India Caucus (Republican) Rich McCormick, co-vice-Chair of India Caucus (Republican) Andy Barr, co-Chair of India Caucus (Democrat) Ro Khanna aser co-vice-Chair of India Caucus (Democrat) Mark Veasey nung den senden amendang tangokba noksa nung angur.

## India-Pakistan arrtsülen IAF exercise tenzükogo

**New Delhi, June 07 (Agencies):** Rajasthan nung India-Pakistan International arrtsü nung Indian Air Force (IAF) exercise agitsü atema India-i Notice to Airmen (NOTAM) sangdongba sülen Honibarnü exercise tenzükogo aser Amongnü (June 8) tembangtsü.

Iba exercise ya IAF-i mapang shia agir aser tanü tenzükba exercise ya Pakistan den arrtsülen anüng nung agir.

Aerial drill ji Honbar nikongdang 3:30 ako nung tenzük aser Amongnü aonung 9:30 ako nung tembangtsü. Iba

mapang nungji exercise agiba region nung anünglen kecha mesenzükdaksütsü.

Indian Air Force ketdangser kati, exercise nungji Rafale, Mirage 2000 aser Sukhoi-30 ama raraba tayimtsütem amshitsü, ta metetdakja liasü.

Ministry of Defence-ibo tang IAF exercise agiba ya Pakistan den tensa mejungi aliba den sendaktepa lir, ta official süabo memetetdaksü, ajisüaka Pakistan den arrtsülen iba exercise agiba ajanga tensa nung ajemdaker iba exercise agir südi, ta bilemer.



## TIR YIMYIM YIMOBILEM (EDITORIAL)

DIMAPUR SUNDAY, MAY (AAMI) 08, 2025

### Temulung süa aliba taküm

**J**anratema, tenük sünga aser pelapela aliba dang Ao o nung 'temulung süa alir' ta jembir. Ajisüaka, asenok asoshi alima nung teti temulung süa alitsübaji kanga tasak, iba yongji asenok aika temulung mesüi alir. Temulung süa aliba tetezü pelapela aliba süra temulung mesüi aliba tetezüji jashia dang aliba takümtem lir. Asenoki sen aika angudang temulung asür, ki tajung nung meshirangi chiyongtsü tajung den chiajema alidang kanga temulung süa alir. Asen mapa nung takok angudang aser tangari asen nung asangdang asenok kanga temulung asür. Ajisüaka, kadang asenoki bilemba ama alima rongsen majangzüktetter aser tangar menepa melitetter, idangji asenok temulung masür. Asenok makamaitba mapang aser shilumanem dang asenok taküm aser kibong temulung süa malir. Tangari asen nungsen jembiba angashidang aser atalatsü dang asenok kanga temulung masür. Aji oda, abensüoshi agi meperidang aser chiyongtsü agi anungdang asenok temulung masür. Kinungtsü aser kinungboi asen aginütsüsa meinyakdang, mesüra taburtemi aseni imlaba ama takok bener marudang mesüra yimten, arogo aser loktii aseni imlaba ama meinyakdang asenok temulung masür. Atangji, itemji meimchir yimya. Iba jagi nisungtem teti pelaa melitetter. Ajisüaka, tenyari Paul-ibo tensa tia ajak nung pa temulung süa alitsü angazükogo ta Filipi tapu 4:11 nung shia lir. Ibaji jangratemtsüka, kechiyong alima nung teti temulung süa alitsü angazükba tetezüji kechi tensa tia arudir aruaka teti pelaa dang alir, teti tenük sünga dang aser teti temulung süa dang alir. Ibaji alima nung nisung ka asoshi tesümgangtsü aser tenükshitsü taküm lir. Iba lima nung nisungtem tejak aser temulungjang reprangdangra temulung masüba agi sünga lir. Ki tajungtiba aser gari tajungtiba agia nisungtem temulung masür, kechiyong alima nung tetoktepa onsara aser anogo shi tasen-tasen aser tajungba-tajungba adoker. Aji oda, kadang asenoki asen taküm libaliro tangar den medemdangdir, asen dangbo tangar takarba aser tangar tajungba anur, iba jagi asen akaba aser asen nem moatsüba agi asen temulung masür, anungji mepelar. Ibaji asenoki Yisu Khrista dak amangba ajanga tensa tia ajak nung temulung süa alitsü mangazükba ajanga lir. Paul ya par nübertem madak yimten tashi tulu akaba nisung liasü. Tepuokdak timtema alibajia pa liasü. Ano, teloki pa tasütsüsa long agi aonba lendonga pai ajangshi. Atangji, alima nungbo yimten tashi tulu amshia merena alitsü akokba nisungji Paul ka liasü, saka kadang tanüla temeshii pa apu, pa tenung, pa jakla aser temulung melen aser Yisu Khristaji alima meimchir temenen yong asü ta pai agizük aser kuli asütsü tenzük. Pa temulung memeyip dangbo anogo shia temulung masüba agi pa mulung sünga liasü. Teti tejashi nung pai Khristantem reshikangshi. Aji oda, pai metetba aser akaba ajak toktsür pai kadang Yisu Khrista sülen anidak, iba jagi pa peladaksü. Aji oda, Yisu Khrista sülen anidakba kija agi pa temulung süa aküm. Atangji, Paul teti temulung süa pelapela alibaji alima tensa mapang ajungba agi masü mesüra ajaki pa meimba mesüra tushiba agi masü, saka kechi tensa tia nung lidir liaka, paji Yisu Khrista den tesendaktep shitak yutetba ajanga liasü. Temulung süa aliba agi Tsüngremi asenok nem moatsüba madak asenok jangratema alir. Temulung süa aliba agi asenok tenükmerem nungi jenbur aser ajak den putepa litetter. Temulung süa aliba agi asen tasü itdaksür, kechiyong Tsüngrem asenok den lir ta asenoki meteta lir. Filipi tapu 4 nung Pauli yamai ashir, "kechi koda ajemzüka alitsü aji ni metet, aser kechi koda jenti kaa alitsü ajia ni metet-- iba miim oji ni angazükogo. Khristai shibai ni tashi itdaksür, pa ajanga ni ajak inyaksü akok." Asenoka Khrista dak amanger süra, tensa tia ajak nung temulung süa alitsü angazüktsübaji kanga tongtibang. Iba jagi tatidang aika koktettsü. Ajisüaka, Laishibai ashir, teti temulung süa alitsü angazüktsübaji 'miim o'. Tetezü, kanga nendaka bushi nung dang aser kanga mepishia asüngdang nung dang angutsü aser agütsütsü.

## OLEMSABANG

### Tarutsü putu asoshi tanü lipuküm jenjang

~ Miss. Yapanginla

(Yashi adok nungi...)

#### Tsüngremer Ketdangsür (Stewardship)

Tsüngremi nisungji inyaksü aser anüksü toktsü (lipok 2:15) iba ya yimsü asütsüba masü, saka ketdangsür (steward) ka ama lipuküm anepalutsüba asoshi lir. Tsüngremji Tematiba lir aser ajak Pa meyong lir. (T.Ken 24:1), anungji Pai yangluba alimaji asenoki meramoktsüla. Asen shisa taka Tsüngremi asen meimchir nem Pai yangluba alima anepalutsü nungloktsü, aser iba tenangzüktep ya kanga dang jangratemtsü lir. Iba mapa ya inyaksü asoshi asenoki alima nung tenteta yangluba (creation) den telongjem nung shilem agia pelateptsüla.

Anungji tanü lipoküm jenjang tamajungba akümba tensa ka nung asenoki koma meimchir merumeru ya melenshia Tsüngremi nungloktsüba ketdangsür ka ama alitsü? Kin ka ama kümer koma iba ketdangsür mapa ya ajak ajungtsü asoshi inyaksü? Development tenung nung iba alima raksa aoer. Anungji alima kümzüka sustainable development bener arutsü asoshi ochishiba (justice) nungdaker. Iba ochishiba ya takar aser maangka alirtem asoshi dang masü saka sensaker sendoka alir ajak asoshi nungdaker. Aji dang masü saka shiruru aser süngdonglidongtem ajak asoshi nungdaker. Ajak ajungtsü asoshi iba mapa ya tang atema dang masü saka tarutsü asoshi tenungdakba lir. iba mopung melenba tensa agi asenok dang asüngdangbji, "Tanü putu yagi tarutsü putupur nem kechi sentsüh atsür"? ("What does our generation owe to generations yet unborn?")

Iba lipuküm yanglushitsü khuret ya tarutsü putupur nem nungloktsütsübaji kanga dang lemtet temela ka lir, saka asenok menua tezüba nung aliba ajanga tarutsü chirnur nem iba khuret yutsütsüji tim masü. Asenokji parnok tetsü tebou asünung ketdangsür tajung ka ama iba alima ya parnok asoshi wazüka yutsütsü tim. Tarutsü nung parnok jangratema litettsüsa anepalutsüla, tang aliba den tajungba yangertettsüsa inyaksüla.

#### Telongjem libaliru teinyaksü (Solidarity and Moral Responsibility)

Alima nung ya linük (habitat) aika lir, aser linük balala esapji shiruru, süngdong aser tzü mopung balala lir. Saka linük ka nung kadang tzü mopung menena mesüra arem saksadir, iba tesemji dang masü saka tanga linük nunga teraksaba jagi kongshiadoker. Anungji lipuküm yanglushitsü maparen nungji pei temeket ajungtsü asoshi dang masü saka arok jenjang ajungtsü asoshi inyaksü tim. Telemtet (solution) ka bener aruba nungji ajak asoshi tajangzük alitsüla, idangi dang iba alima ya tarutsü putupurtem atema alangzüktettsü.

Aiben dang tashi tait kin (developed nations) temi parnok taküm libaliro tajung akumtsü asoshi bushidang, mebilemdangi merumeru inyakyim ajanga tangar maka mait (developing nations) kin nung teraksapa agi kongshidaksür. Anungji kin tem aser nübur teinyaksü nungji telongjem aser alima ajak tajangzük angutsü jakla apitetsüla (sense of moral responsibility and equality for all people). Kechiba ta süra, kin ajak iba alima nung ya kibong ka ama Tsüngrem kübok yangluba lir. Takar aser sensaker, tazünger aser mazünger, tamangba balala kin balala ajakji meimchir dang, aser meimchir ajaki tepela aginer, shingaia tekangshi nung meliner. Talisa meimchir ajak iba tepela jenjang bushitsü tim tashi lir. Aser nübur ajaki kadang iba ya angateter, asenoki pei sasa dang ajak aria bilemba mulungsentsü renloktsü. Iba ajanga alima rangben aneptsü asoshi külemi mapa kuma inyaktetsü.

#### Lipuküm nung Tatakot (Ecological Balance)

Science aser technology-i tesümgangtsü temelenshi bener arutsü ba ya asenoki pangka repranger, saka iba den külemi alima tesem kar nungbo meimchirtem chiyungtsü teperi mali ayaba jenjang nung lir, aser taküma samar. Meimchirtem anung (outer space) nung yimzüdang alima nung tzüyimbo menena kümogo. Ashiko asenoki dang tenüki ngua aliba linük, shiruru, süngdong, mesen aika tarutsü putu purtemibo mangutsü akok. Iba alima ya junga tatakot (balance) jenjangi bener arutsü asenok dak tashi ji

Alima rangben ya Tsüngremer talidak lir aser Tsüngremer tatenba mali nungbo asenok iba lima nung pei ki ama melitettsü. Iba alima yanglur sülen, mezüng meimchirtem (first humans) alima temokong nung Tsüngrem den jaja liasü. Alemlü nungi, nüburtem pa Teyanglur den tenem talak, lisem lima, tzüyim nung ajurua liasü. Yipru aser menoknok nung Tsüngremer temeshi tashi (divine power) jangjadaksü. Tsüngküm aser petinu telemsaba nung Tsüngremer shisatsü aser mulungtok ngutet. Aser tanüa item yimya nung Tsüngremer tatenba meteter. Tanü nübur tem aikati lipuküm assohi nungzüba ajanga asen

Teyanglurji pai alima nung yangluba (nature) tem ajanga ajurur ta ochiji meteta arur aser agizüker.

Anungji asenok Khristian ka asoshi Tsüngrem den teti tesendaktep alitsü aser pa temeim ajangshitsü asoshi lipukümji wazüka ayutsüla. Iba teyanglur aser teyangluba tesendaktep (creator-creation relationship) shisadangtetba ajanga asen lipuküm ya ajak asoshi tanaben wazüka yutettsü.

Alima nung Tsüngremi yangluba ajaki pa nem akhümtsübu agütsür kechiyong "alima aser yangji sünga aliba, alima aser yangji alirtem, Kibuba meyong lir" (T.Ken 24:1). Anungji asenoki iba lipuküm ya akhümbanga kümzüka meyetet nungbo Tsüngrem dang sentsü asütsü.

Asenok kadang Tsüngrem anasa teti lidir, alima nung yanglua aliba ajak den kasa ama shilem agitettsü. Taküm tetezü shitakbala angatetsüji tamang katet ketdangsür ka ama ali nungang metettsü. Ketdangsür tajung ka jagi iba alima ajungba asoshi pelar aser kümzüka ayutsü asoshi nükjidong ayur.

"If future generations are to remember us with gratitude rather than contempt, we must leave them more than the miracles of technology. We must leave them a glimpse of the world as it was in the beginning, not just after we got through with it."

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Israel nung Yisu-i mezüng sayatenya mapa inyakba tesem ngutetogo



Khirbet Qana yimdak archaeologist temi ali tua bushisüngdangba mapang tutetba noksa (abelen) angur. Iba tesem ya Yisu Khristai mezüng sayatenya mapa inyakba tesem lir, ta parnoki ashir.

**June 07, 2025:** Yisu Khristai mezüngbuba sayatenya mapa inyakba- tzü agi yi kümdaktsüba tesemji Kafr Kanna nung masü saka Khirbat Qana yimdak lir, ta puti otsü nung mongin aser archaeologist, Tom McCollough-i metetdaksü.

Taoba mapang Kentucky's Centre College nung tesayur inyaker, McCollough-i, "Akhidang Khristantemi kanga akhümtsüba lungki complex ka onoki ngutetogo. Temeshi ainlen jajar Khristantemi Yisui tzü agi yi kümdaktsüba tesem semdangba mapang nung parnoki iba complex ji amshia liasü," ta metetdaksü.

Paisa, "Iba complex ya Aso 5buba tatembanglen mesüra Aso 6buba tejaklen nungi amshia liasü aser maneni Aso 12buba nung Crusader mapang nunga temeshi ainlen jajartermi amshia liasü," ta metetdaksü.

Israel kübok Galilee nung Kafr Kanna jila ya akhidang Cana yim aliba tesem lir, ta bilema liasü, ajisüaka iba tesem ya Khirbet Qana nung ang lir, ta McCollough-i ashi.

Khirbet Qana ya 323 B.C nungi 324 A.D mapang tashi

nung Yihuda nung yim ka liasü.

Yisu Khristai Cana yimdak kiyir benjung ka nung tzü agi yi kümdaktsüba tesem tasenba indang tongti kuliji lungki ana lir, aser yangji Kangki aika lir. Itemji küm 1500 tejaklen nungi liasü aser Khristantemi amshia liasü.

McCollough-isa, "Khirbet Qana yim nung kuli anguba ama tanga yimtsüngtem nung kuli tejangja mali," ta metetdaksü.

McCollough-isa sabang ka aser satem ka nung lung agi yangluba mori chipo angu.

Paisa, mori chipo pongu yutettsüsa takdang ka liasü, aser ibaji Laishiba (Yohan 2:1-11) nung shia aliba ama kiyir benjung ka nung mori chipo trok aliba den mesükteper, ta ashi.

Iba complex jara nung 'Kyrie Iesou' lir; iba ya Koine Greek oren tetezü 'Kibuba Yisu' lir.

"Akhidang temeshi ainlen jajartermi ozülüji ajanga parnoki inyakba aser Galilee nung Cana-i arudang anguba naji kanga mesükteper," ta pai ashi.

Aso mezüngbuba mapang nung Yihuda nung puti otsü nung mongin, Flavius Josephus bushitetbatem tetshia McCollough-i, "Pai (Flavius)

Cana yim tetshiba tesemji Khirbet Qana den kasa aser pa senzüsempogba den-a puteper," ta ashi.

"Josephus-i Cana tetshiba, Tasen Lai aser 'rabbinic' tezülubatem ajanga iba yimtsüngji Galilee tzüyim anasa aser lower Galilee region nung Yihuda nung yim ka ta ashir. Item ajakji Khirbet Qana den puteper," ta pai ashi.

McCollough-isa, Aso 18buba mapang tashi nungbo Kafr Kanna ya 'Cana' ta mezüngshi aser temeshi ainlen jajartermi tesem ka ama mezüngshii liasü, ta ashi.

McCollough-i, "Onoki ali tua bushisüngdangba ajanga bushitetba ajanga akhidang Laishiba nung aliba yim ya Yihuda nung yim ka aser Yisu taküm aser Pa ministry nung tiyongsü tesem ka liasü ta kuli tejangjaba akümtsü," ta ashi.

McCollough-i, "Osangtajung Yohan nung Cana ya Yisu atema kümzüka aliba tesem ka mesüra ministry atema tongti tesem ka liasü. Yisu aser Pa nütsüngtemi Judea nung tanemba ajuruba sülen parnok meyipa aruba tesemji ibai lir," ta ashi.

## Khristan refugee tem Panama nung ano ita 6 alitsü melar

**June 06, 2025:** Iran tsür arrshi küm 27, Artemis Ghasemzadeh densema Panama nung jenoka aliba Khristan refugee tem ano Panama nung ita trok alitsü atema mapang atsülangtsüogo, ta International Christian Concern (ICC)-i metetdaksü.

Iran tsür Ghasemzadeh den Iran nungisa Khristan kibong ana tang Panama City nung aliba hotel ka nung jenoka lir. Parnok anogo 30 Panama nung alitsü atema mela, iba sülen ano June 7 tashi ita ana temelaba agüja liasü, aser tang tesüsa ano ita trok alitsü atema parnok nem temelaba agütsüogo.

Islam yimsü toktsür Khristan yimsü agizüker Iran tsür Ghasemzadeh Panama nung jenokba sülen ita asem jungogo.

Lai June 7 tashi nungbo linük tasen kar nung jenoktsü atema lai teyari bushia liasü, ajisüaka maneni ano ita trok Panama nung alitsü atema temelaba agütsüogo.

Ita asem shi tejaklen Ghasemzadeh aser tedi, Shahin nati Iran linük toktsür ajen. Tena mezüng Dubai-i aoba sülen Mexico-i ao. Iba nungjagi tenati nisung kar teyari agia United States telungi ia liasü.

Adianu anaji San Diego nung anogo pongunü pua ayuba sülen tena piladaksü. Ghasemzadeh den refugee kar Panama-i yok aser tedi, Shahin bo Houston nung aliba detention facility ka nung puok.

Ghasemzadeh aser tedi nati U.S nung immigration policies

meteta dang lir, ajisüaka Iran nung Islam yimsü toktsür Khristan yimsü agizükerterm kanga reshikangshiba ajanga tedi tenati Iran toktsür ajentsü lemteta liasü.

Iran nung tang tashi Armenia Khristantem, Assyria Khristantem aser Catholic Khristantem lir. Ajisüaka iba linük nung anti-conversion ozüng tesashi lir, anungji Islam yimsü toktsür tanga yimsü dangi meyipra tepuokdak ayutsü mesüra tasüba temerenshia agütsütsü akok.

New York, Mexico aser Colombia nung lawyer temi Ghasemzadeh den Khristan refugee temji linük kar nem agizükdaktsütsü atema teyari bushitsüdar.

## ANO GO ABEN TSÜNGREM DEN

## PUTEPDAKTSÜBA KHRISTA

"Item memelaba tenokdangba ajakji osettem den dang sentaktepa lir, koba osettem maneni amshiba agi sama-a aotsü."  
~ Kolosi 2:22

Putepdaktsüba-ta kodang südir English word nung harmony ta angatetdi. Aser harmony tetetzü tebilemba nung, temolungjang nung aser mapa nung ka kuma longjemba.

Kolosi nung dangi kechiba Paul-i iba shiti ya zulu ta s?ra iba mapang nung ya Kolosi nung teyazü ainkartemi tesayuba balala, aser tamangba den meyoktepa alimar temzüng ozüng tesashi bener arua tamangertem tamangba nung makmakshimakba tensa ka liasü.

Kodang tekong 20-ji zungdir, Paul-i yangi Kolosi nungertem dang alimar tesayuba temzüng ozüng koba tamangba den meputep lir, iba amala nung tashi anga malitsü indang shia angutsü kechiyong itemji metsängareta anidakba agi asenok tamanger tajung ka akümer masü mesüra iba jagi asenok tanela ajungketer masü. Kolosi nung nükmenjibo reprangdangra Yisu, saka mapa aser tamangbajibo meputepbaji angutsü. Anungjiang Paul-i asenok dang Yisu Khrista jiang asenok Arogo asoshi tekolak lir, aser Pa ajanga dang asenok tamanger ka takümüji tasen kuma pa taochi aser pa dak nungi aruba shisats? ajanga dang putepdaktsütettsü akok ta shinübaji angutsü.

Anungji Paul-i tekong 22 nung ashi ama, sama aoba alimar tesayuba nung masü saka Yisu Khrista shibai atangji lenmang sayur, Pa dang anogoshia shisatsü meshia, tensa ajak nung masetshiba tamanger ka kuma putepdaktsüba Yisu Khrista sülen temulungjang nung, tebilemba nung aser mapa nung ka kuma alitsü merangdi.

## Odisha nung pastor Mathew Nayak nungtem nung Tenla ki asü

**June 07, 2025:** Küm 17 kidangji adenshia osangtajung tejaklen Odisha kübok ken atenba den külemi tekülem sentong agi.

Sentong lenir Archbishop John Barwa-i Arogo tasenba dang taoba mapang Khristantemi takoksa tulu ajuruaka Tsüngrem maneni adenba kuli asütsüla, ta ashi.

Iba Tenla ki project tayonger, Sebastian Thottamkara-i, "Asenok ola nembangtsütsü merangba tesem nung iba Tenla ki nokdaka lir. Asenok tanela milak meremseptsütet. Sarasadem ki den külemi asenok tanaben yangershiogo," ta ashi.

Iba Tenla ki asüba nung Khristantemi angati nübo aser rongsen tenla agüja liasü. Küm 17 tejaklen iba tesem nung tetsübu liasü saka tango tesünap nung longjemogo.

Hindu nütsüng teimba aliba Gudrikiya yimdak Khristan kibong 45 lir. Tenla ki tasenba ya tekülem ki dang masü saka Khristantem maitüsü aser aremzüka temaitüsü lir.

Putirtem, nun tem aser Arogo züngsemtem Tenla

AO OSHI ANGAZÜKDAK:

TANÜ ANGAZÜKTSÜBA OJANG

Tenten

(v) alu nung metsüjang meyokdang putiri among nung tsük tenokba (pre-seeds-sowing ritual done by priest)

\* Akhi mapangbo yimtak putiri tenten masü tashibo yimer shingaia pei lu nung tsük meyok.

Tentet

(v) telok mesüra sobaliba tasen ka tenzükba (form or founded a new thing)

\* Tanü asüng lokti tentet tasen aika tentetogo.



Tir Yimyim

OLONG PAITEP # 7175

Grid for crossword puzzle #7175 with numbered squares.

TIPLIN

- 2. Teburtemi tejak nung awaba - (8)
6. T \_\_\_ em - (3)
8. Tzük ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanüdangtsü - (4)

OLONG PAITEP # 7174 TELANGZÜBA

TIPLIN :

- 2. Asangwa, 4. Pasa,
6. Temopu, 7. Sayu, 8. Sang,
9. Ibai, 10. Juli, 12. Temeja,
13. Aisü, 14. Pongsen.

LANGTSÜNGLEN :

- 1. Manga, 3. Apong, 5. Angu,
6. Techira, 8. Shiotep, 12. Jara,
13. Lemsä.

NAI-A YA METETTER MA



OnePlus 13s India nung sayaogo. Iba phone nem Snapdragon 8 series chipset-i tashi agütsütsü aser fast-charging battery ka den Plus Key tasen ka keta lir. Iba phone 12GB + 256GB variant ya sen 54,999 aser 512GB storage model ya sen 59,999 agi angutsü. India nung OnePlus 13s phone ya pink, green aser grey sentsü nung angutsü. Phone indang screen 6.32-inch den LTPO AMOLED panel ka keta alitsü aser 12GB RAM aser 512GB storage densema lir. Phone indang battery 5,850mAh aser 80W fast charging speed den support asütsü. Phone tesülen 50MP primary sensor aser 50MP telephoto lens keta lir aser tejaklen selfies aser video call atema 32MP shooter ka densema lir.

Sikkim anentsüh: Alima penzür ajak & army 76 Chaten nungi aninogo



North Sikkim nung Honibarnü Chaten nungi army personnel 76 prongla tayimtsü ajanga kümzüka aninenba noksa angur

Gangtok, Aami/June 7 (Agencies): North Sikkim nung Honibarnü Chaten nungi army personnel 76 prongla tayimtsü ajanga aninogo, ta ktdangsur kati ashi. Iba tesem nung anentsüh aika aluba ajanga nokdang lir.

Ktdangsurü yagi ashiba agi, anentsüh agi kongshir aliba tesem nung yagi taolen makai sabanger aliba alimapenzürtem aninba sülen kanga junga sentong yanglur army tem ya aninogo.

"Ajak senteper army 76, MI-17 helicopter asem nung aninoigo. Chaten nungi anung ajanga sepaitem ta tanü aninogo aser helicopter temi army tem ya Chaten nungi Pakyong Greenfield Airport-i anir oa liasü," ta ktdangsur yagi osang jangjashitsü.

osang ajanga ashiba agi,

state sorkari lendong agi kongshir aliba iba tesem ya kanga kümdanga meita atadar aser parnoki takokba tashi teyari ajak agütsütsü ta nangzüker aliba maneni lephsia metetdaksüogo.

North Sikkim nung Hokolbarnü nungi tekümüzkba maparen tali asendenshir inyak, aser ktdangsurtemi Chaten nung taolen makai sabanger aliba alima penzür 17 anina liasü. Tawa anentsüh kanga sashia aluba ajanga iba tesem dak kongshir lir.

Ktdangsurtemi alima penzürtem ya helicopter amshia Pakyong Greenfield Airport-i anir oa liasü.

Tawa tziunglu kanga sashia aruba ajanga North Sikkim nung tesem aika nung anentsüh aluogo aser iba ajanga lenmang agi tesendaktep dak kongshia

liasü. Tziunglu aruba aser anentsüh aluba ajanga alima penzür 1,600 dak tema anogo aika Lachen, Lachung, aser Chungthang jila nung sabangatokba sülen state sorkar aser agency balalai parnok kümzüka liasü.

Multi-agency rescue & search operation nung Indian Army, National Disaster Response Force (NDRF), State Disaster Response Force (SDRF), Border Roads Organisation (BRO), aser Mangan district administration densema liasü. Rescue team temi helicopter tem yoka alima penzür 140 dak tema anina liasü.

Kasa mapang nung anentsüh ka agi June 1 nü nikongtsütsü Chaten nung military camp ka kongshiba sülen army asem asü aser pezü yirua liasü. Maneni samar aliba sepai trok bushidar.

BJP Rajya Sabha candidate asütsü Kanad Purkayastha shim

Guwahati, Aami/June 7 (Agencies): Bharatiya Janata Party (BJP)-i Honibarnü sangdong ka ajanga Assam nung party state secretary Kanad Purkayastha, taruba Rajya Sabha elections atema candidate asütsü shimogo.

Party indang central election committee-i iba election atema Purkayastha indang candidature agizükogo. Election ya June 19 nü agitsü aser kasa anogo vote azüngtsü.

Barak Valley nungi nungtugu party lenir Kanad Purkayastha

ya BJP lenir tejen aser taoba Union minister Kabindra Purkayastha'er jabaso lir.

Assam nung Rajya Sabha menden ana atema election agitsü. BJP-i taoba mapang menden ka atema parnok candidate ka yoktsü sangdongba den tanungba menden ka ya parnok den sendaktepa aliba party Asom Gana Parishad (AGP) nem lemezükja liasü.

Iba osang sangdongba sülen BJP Assam Pradesh-i parnok indang official social media

handle X ajanga tenüngsang agüja liasü.

BJP Assam Pradesh-i, "taruba Rajya Sabha election atema Bharatiya Janata Party-i nominate asüba atema Kanad Purkayastha nem tenüngsang agütsür," ta ashi.

"Pa ya bendanga agüja inyakba karyakarta ka shibai küm aika jenjang balala nung party tenzükogo. Pai Assam nunger timla aser tejangraba atema nokdaksü ta onoki temulung lema bilemer," ta state unit yagisa shisem.

Manipur: Moreh SDPO tepsetba ken o nung KNA lenir ka puogo

Imphal, Aami/June 7 (Agencies): Assam Rifles aser National Investigation Agency (NIA) team kati Hokolbarnü Kuki National Army (KNA) lenir tongtibang ka puogo. Pa ya Moreh police station Sub-Divisional Police Officer (SDPO) tepsetba aser police commando asem yirutsüba nung tasa asartem rongnung tongtiba liasü.

Osang ajanga ashiba agi, Assam Rifles aser NIA na senteper Hokolbarnü Manipur, Tegnoupal district nung Moreh Police station kübok Mandoi Veng tesem meita ao aser KNA lenir Kamginthang Gangte pua liasü.

Meita aoba mapang iba

team yagi 9 mm pistol ka, magazine ka aser tashishitsü aketba kuli kaketem nguteta liasü.

Ktdangsurtemi ashiba agi, Gangte shiba tenüng osang kar nungbo K. Guite ta amshia lir, pai tasa asa-a 2023 küm October ita SDPO Chingtham Anand sniper agi tepsetdakja liasü. Eastern Ground nung helicopter ka anendaksütsü atema renemshiba achaayanga aliba mapang iba ktdangsur ya sniper kati khaseta liasü.

SDPO ya tepsetba sülen Manipur police commandos team ka Moreh-i aritepa ao. Ajisüaka tia maka Kuki nunger telungpurtemi mendanga atar iba team ya Sinam aser

Bungyang yimtsüng tsüngda amak aser iba mapang police asem yirua liasü.

Kasa mapang nung Moreh indang Civil Society Organizations (CSOs) temi sangdong ka ajanga Kamginthang Gangte apuba aitsüogo aser ashiba agi, ktdangsurtemi temzüng ozüng sülen shitak manidaki iba meita aoba sentong ya benoka inyaka liasü.

CSO temi 5 Assam Rifles Lt. Col. Nitin Sharma aitsüogo aser ashiba agi jurila tebilemba dak ajemdaker iba jenjang agiogo. CSO temisa Honibar; June 7 nü ghonda 24 mokdanga ayutsü ayongzüka liasü.

# Taruba hopta London nung US-China senden amentsü



Donald Trump & Xi Jinping

## Washington, Aami/June 07 (Agencies):

White House indang "Liberation Day" tariffs mech mangatetep adoka aliba tembangsü asoshi London nung June 9 nü China den shishilempaba ken o tasen jembitsü, ta US Tir Donald Trump-i Hokulbarnü sangdong.

"Secretary of the Treasury Scott Bessent, Secretary of Commerce Howard Lutnick, aser United States Trade Representative, Ambassador Jamieson Greer nungeri Homba, June 9, 2025 nü London nung Representatives of China den Trade Deal atema ajuruteptsü," ta pai pa indang Truth Social sapang nung ashi.

"Iba senden ya junga amentsüla. Iba ken o nung temulung agütsüba atema kanga pelar!" ta pai ashi.

Hombarnü British yimtiba

nung shishilempaba indang jembishinütsü aliba ya Trump-i taküm 'trade war' tenzüker alima nung economies tulutiba linük ana tsüngta tanaben jembishinür alitsü, aser linük ana yagi toktepa tariffs meshiteper.

Trump-i par tempas aser tsükchir linüktem dang "Liberation Day" tariffs meshitsü sangdongba sülen Washington aser Beijing tsüngta mezüing ajurutepa jembiba ya taoba ita Geneva nung liasü, kong linük anaprongi toktepa tariffs meshiba ajemtsü mulungtep.

Brehostibarnü Trump-i China Tir Xi Jinping den jembiba sülen shishilempaba ken o maneni jembitsü ta pai sangdonga liasü. Tariffs ajemtsü nükjidong nung trade agreement agiba nungi Beijing atsüngzüka aor ta Trump-i aitsüba sülen Xi

Jinping den tezüngzüktep yanglutsü kanga tasak lir ta shia liasü.

May ita Geneva nung United States aser China nungi ketdangsür temi trade agreement ka yanglua kati ka indang osettsüset nung tariffs ajemtsü pangjemtepa liasü. Iba tezüngzüktep kübok US-i China nungi bener aruba oset nung tariffs shilem 145 meshia aliba shilem 30 dang meshitsü mulung aser China-ia America nunger oset nung tariffs shilem 125 meshia aliba nungi shilem 10 dang meshitsü lemtet.

Ajisüaka China-i yamaji meinyaker ta Trump-i aitsü, anungji rongsenketzüng tsütsü asendenshir tayang kepzükteptsü südi ta nüburtem shisabulua liasü.

Kasa mapang China-ia US-i tawa Geneva trade truce nung kanga mejungi aibelena AI chip export control guidelines amala nung tenokdangba balala agütsür aser China nunger indang visa agientsür ta aitsü.

China-i tongtipang minerals aser rare earth magnets tem yoktsü asoshi temelaba agütsüba nung kanga menudaktsür, ta US ketdangsür temi Beijing dak tai tonglokja liasü. Ajisüaka London nung jembishinüba ajanga linük ana tsüngta mangatetep ajemtsü teimla lir.

# Myanmar general tepsetba atema arishi küm 6 tetsür ka dena apu

Naypyitaw, Aami/June 07 (Agencies): Taoba ita retired army officer ka tepsetba nung shilem agi südi ta temulung melemi Myanmar nung aliba security forces temi nisung 15 den külemi arishi küm trok tetsür chanu ka densema apu, ta sorkar meyong media ajanga ashi.

Temulung melemi alir 16 - tebur 13 aser tetsür asem - ya taoba ita tatemlen linük nung region balala pezü nungi apu, ta sorkar meyong Global New Light of Myanmar ajanga Hokulbarnü ashi.

Pua alirtem ronung nisung tepseter ta tai tonglokja alisang Myo Ko Ko'er jala arishi küm trok tain Lin Latt Shwe dena lir. Osangkaket ajanga ashiba agi tanur aser lar tsürabor ya Bagan yimti nung apu.

May 22 nü Yangon nung par kima arishi küm 68 tain retired Brigadier General Cho Tun Aung khasetba ya kanga junga memeteti aliba telungpur telok Golden Valley Warriors temi tenüing agiogo.

Pua alirtem nungya private hospital ka kibur dena lir, shibai nisung tepseter temang anepalu ta ashir. Nisung tepseter ya General Aung dak amakba mapang injang agi yiru

ta osangkaket ajanga ashir. Ajisüaka pua aliba nisung 16 ya par operation nung mali ta Golden Valley Warriors ajanga ashi, ta independent news outlet The Irrawaddy ajanga ashi.

Taoba mapang ambassador to Cambodia inyaka alidang Cho Tun Aung tepsetba ya tang yimsü tesüdak mitkar den sendaktepa alir anema azüdokshiba nung tesüsaba alitsü, shirnoki 2021 küm democratic yimya nung shimba Aung San Suu Kyi'er sorkar atsüngdoka liasü.

Mitkar temi tashiyim amshia sorkar atsüngdoka Myanmar nung civil war adokba sülen temaba jenjang nung aliba aser mapa nungi anisüngzüng ngur aliba mitkar lenirtem, senior civil servants, mitkar tem den sendaktepa aliba ketdangsür aser business associates aser osang agütsür tem dak tenük yoker tepsettsü merangba tenzüker.

Cho Tun Aung tepseter mapang tatsüka tsüngta Golden Valley Warriors ajanga Facebook nung sangdong ka agütsüba nung Aung yagi Myanmar indang National Defence College nung internal security aser counterterrorism sayua liasü, ta ashi.

# Vladimir Putin ya nisung tepseter ka lir: Ukraine tir



Ukraine Tir Volodymyr Zelenskyy

## Kyiv, Aami/June 07 (Agencies):

US Tir Donald Trump-i Ukraine aser Russia tsüngta tang rara aliba ya tanur ana playground nung raratepba den medemdangba nung telangzüba agütsüadang Ukraine Tir Volodymyr Zelenskyy-i Russia Tir Vladimir Putin dang nisung tepseter aja.

"park nung aliba playground nung Putin den onok ya tanurtem masü. Pa ya nisung tepseter ka lir, shiba tanurtem tepsettsü iba park-i aru," ta Zelenskyy-i "This Week with George Stephanopoulos" indang clip ka nung ashiba Hokulbarnü saya.

Russia-i amak tenzüker tesüiba küm asem tsüngta Ukraine nung teraksa agütsüba aser timtemba ya Trump-i shidakba nung angateter asü, ta

co-anchor Martha Raddatz-i asüngdangba sülen pai iba ya langzüa liasü.

Missile ka agi kinungtsü aser tanur tepsetba sülen Ukraine nunger tanur tebu ka kanga temulung shirangba indang Zelenskyy-i rasaa ashi aser Trump-i iba ama temulung ayangba junga memetettsü aser mangatettsü, ta ashi.

White House nung German Chancellor Friedrich Merz den külemi osangbener den jembidang, "Khen-khen, aser ibai ni tangatetba tamajung nung jembir asütsü akok, saka khen-khen tanur ana tamachi ama raraba nai angur. Parnok kati ka sempar, aser parnok park ka nung rarateper," ta Trump-i ashi.

"Ner tanur ana lir. Parnok rarateperjen rarateper. Khen-

khen nai parnok mapang tatsütsü raratepdaktsür. Nenoki aji hockey aser saisapong nung angutsü. Referee temi parnok seconds ishishi yutsür, mapang tatsütsü yutsür bendanger."

Trump-i Bodhbarnü Putin den phone ajanga jembiba sülen pai linük ana tsüngta tangsa yimjung alitsü atema jembir masü ta ashiba sülen pai tanur ana raratepba indang ya jembia liasü. Ukraine-i drone amshia Russia indang airbases kar amakba nung Russia-i tayang kepzüka amaktsü ta Putin-ia pa dang ashi.

Trump aser Putin tsüngta phone ajanga jembiba sülen anogo ishika lir Moscow-i drones 400 dak tema aser ballistic missiles densema missiles 40 dak tema amshia Ukraine dak amak, ta Tir Volodymyr Zelenskyy-i Hokulbarnü shia liasü.

Ukraine nung nisung asem asüba jangjaogo aser 50 jungnüa yiruba osang lir aser ano alitsü akok, ta Zelenskyy-i ashi. Teraksatsüba atema Russia aitsütsüla aser Moscow-i yimitem amaker aser nisung takum samatsür, ta pai ashi.

Ukraine-i 'Operation Spiderweb' tenzüka Russian military raksaja Tu-95 aser Tu-160 densema bomber planes tongtipang aika raksatsüba sülen Russia-i tayang kepzüka amak.

# Bangladesh election April 2026 nung agitsü BNP-i memulunger

Dhaka, Aami/June 07 (Agencies): Taruba küm April ita national elections agitsü ta Bangladesh chief adviser Muhammad Yunus-i sangdongba Bangladesh Nationalist Party (BNP)-i aitsü aser election agitsü menuba atema nüburtem mepelar ta ashi.

BNP ajanga Honibarnü sangdong ka agütsüba nung, "July ita yimsüsür anema kaketshir aser nüburtemi nokdakba mapang kanga bendanga agütsüba ajanga nüburtemi takok angu. Saka menüngdakba nung election agitsü menuba asoshi nüburtem jashir aser ain adoker," ta ashi.

Yunus-i iba osang sangdongba sülen acting chairman Tarique Rahman-i anir BNP national standing committee ajungben virtual meeting ka mena liasü.

Ramadan aser school tatidang agitsü aliba aser tzüngsang mopung majungtsü teimla mimh election ya taküm December malemdangsa agitsü committee ajanga mapang talangka nungi khanga aruba nenshia jembia liasü.

"Iba linük nung aliba nüburtem, pei vote agütsütsü temeden küm ter dak tali mamshitetiaruaka, samaba, tepsetba, tepuokdak ayuba,

yiruba aser merenshiba liaka voting ajanga democracy tanaben lidaktsütsü inyaka aru," ta party ajanga ashi.

April ita Ramadan mapang election agiba ajanga logistical aser yimtenren tsütsü tebenja adoktsü aser item kuli amshia anu tali menudaktsütsü, ta BNP ajanga ashi. Ano Yunus-i December ita kechiba election magitettsü ta kuli magütsüba atema parnoki aija liasü.

Ajidang masü chief adviser yagi justice, temelenshi aser election ketdangsütsü mapang alema oa inyaker ta tai tongloktsü. "Pai jembiba nung o meshidak amshiba asoshi jashiba senden nung lemsatetep," ta BNP ajanga ashi.

2024 küm August ita Sheikh Hasina'er Awami League sorkar laoba sülen Yunus ya chief adviser mapa inyaka tenzüker. Pai election ya temürek, yimjung, benjong ama aser ajak densema agidaktsütsü nangzüker, saka pai sangdongba yagi BNP aser danga opposition telok den tensa tamajungba akumer amai ajiteter.

Taoba ato kilonser Khaleda Zia lenisüba kübok BNP yagi elections tangsa agitsü khanga arur, saka kaketshir aser right-wing telok kari menur agidaktsüner aser temelenshi tajung akaba sülen election agitsüla ta ashir.

## Waseem nem ICC Men's Player of the Month naroküm agütsü



**Aami/June 7, 2025**

**(Agencies):** UAE captain Muhammad Waseem nem May ita atema ICC Men's Player of the Month naroküm agütsüogo.

Pai kanga jung asaya-a par team-i otsütsüsa Bangladesh den T20 asayamung ka akokba sülen pa nem iba naroküm agütsüogo. Iba ya densema Waseem-i tang agi tanabenbuba iba naroküm ya agizükogo. Pai 2024 küma April ita iba naroküm agizüka liasü.

Arishi küm 29 tain asayar yagi Scotland nunger asayar Brandon McMullen aser USA nunger asayar Milind Kumar na ajateta iba naroküm agizükogo.

"ICC Player of the Month award tanabenbuba anguba

atema ni kanga pelar," ta Waseem-i ashi, shibai iba naroküm ya par team, support staff, aser fan tem nem bendanga agütsüogo.

Waseem-i pa tejakdang ser team ani aser T20I asaya asem nung pai run 145 yanglu aser pa indang strike rate 166.66 liasü. Mezüngbuba asaya nung run 54 yangluba sülen tanabuba asaya nunga pai ball 42 nung run 82 yanglua UAE-i tang mezüngbuba Bangladesh akokba nung teyari tulu agütsüogo. Sharja nung UAE-i iba asayamung ya 2-1 agi koka liasü.

Paisa, ODI nunga kanga junga asayaogo aser asaya pongu nung run 169 yanglu aser pa indang average 33.80

liasü.

Iba asayamung akokba ya UAE nung cricket asaya renloka aoba temaitsü ta shia Waseem-i team nung lanur asayatem nem tenüngsang agütsü aser temaba jenjang nung asayaba team tem den asayatsü atema team tejangraba aliba lemsatop.

"Onok nukjidongji maneni renloka aotsü aser international asayamung tongtibangtem nung onok asayaba metetdaksütsü asoshi lir," ta pai shisem.

Iba asayamung akokba ya UAE cricket asoshi alizüng tongtibang ka tongtetba asütsü aser iba ajanga team global stage nung renloka aoba sayur.

## Club World Cup nung Ronaldo masayatsü

**Aami/June 7, 2025**

**(Agencies):** Portugal captain Cristiano Ronaldo-i ashiba agi, pa iba ita asayatsü aliba Club World Cup nung masayatsü. Paisa, iba asayamung nung asayatsü aliba team temi pa nem maongka agütsüba pai magizüki liasü, ta ashi.

Arishi küm 40 tain asayar ya June ita tembangba den külemi Saudi Arabian club Al-Nassr den tenangzüktepba yanglur aliba tembangtsü.

May ita Fifa tir Gianni Infantino-i, Al-Nassr pur qualify mesütetba sülen Ronaldo ya Club World Cup asayatsü aliba team ka nung adentsü akok ta shia liasü.

"Ni Club World Cup nung shilemagitsü," ta Ronaldo-iashi.

"Team kari kü den tongtepratepogo. Kar tebilemba kanga tajung liasü aser karbo kecha tetzü maket liasü, ajisiüka nai ajakbo inyaksü memerangtettsü. Nai ball ajakbo mepushitsü," ta pai ashi.

May ita Al-Nassr pur league asaya tatembangbuba asayaba

sülen Ronaldo-i social media nung post ka ajanga, chapter tembangogo, ta ashi aser iba ajanga pai club toktsür aotsü akok ta ajaki bilema liasü.

Ajisiüka sources-i BBC Sports dang ashiba agi, Ronaldo den tenangzüktepba yanglushitsü atema club kanga temulung lemteta lir.

Portugal pur Deobarnü Spain den Nations League final masaya tsüngda Ronaldo-i pa tarutsü atema telemtetba ka tembanga agitsü ana nung lir ta ashi.

Manchester United den tenangzüktepba yanglur aliba thitsüba sülen Ronaldo 2023 küm Al-Nassr nung aden.

Iba club nungi 111 ben asayaba mapang pai goal 99 idaktsüogo, kong taoba season asaya 41 nung goal 35 idaktsüba densema lir.

Maneni Bodhbarnü Nations League semifinal nung Germany goal 2-1 agi akokba asaya nung Ronaldo-i tanabuba goal ya idakja parnoki asaya koka liasü.

## Format ajak atema New Zealand indang head coach Walter kümogo

**Aami/June 7, 2025**

**(Agencies):** Rob Walter, format ajak atema New Zealand cricket team indang head coach kümogo.

Taoba mapang South Africa team white-ball coach yagi küm asem atema tenangzüktepba yangluogo, aser New Zealand team Zimbabwe-i oa masaya tsüngda pai iba mapa ya June ita tom nung agizüktsü.

Pa lenisüba nung 2027 küm taruba One-Day International World Cup dena asayatsü aser iba den 2026 aser 2028 küm T20 World Cup tema asayatsü.

Maneni 2028 küm Los Angeles Olympics nung cricket mezüngbuba asayaba mapang New Zealand team-a asayatsü akok, koba T20 format nung asayatsü.

Arishi küm 49 tain Walter ya South Africa team nung inyakba mapang New Zealand nung dang lia liasü ta osang angazükba sülen iba mapa atema asadangertem rongnung pa-a ka aküm.

South Africa team coach mapa inyakba mapang pa lenisüba nung par team 2024 T20 World Cup final-i ai saka tia maka run tenet agi India mekoki liasü.

Iba asayamung tera agi dang makokba den Walter-ia anir



**Rob Walter**

2023 World Cup aser 2025 Champions Trophy nunga par team semi-finals tonga asaya liasü.

"Blackcaps pur ya joko mapang tatsüka alima nung takok tajung anguba aser ajaki züngshiba team ka lir aser iba team nung inyaksü atema maongka anguba atema kanga pelar," ta Walter-i ashi.

"Sempet tajung aketba asayatem aser support staff tem den külemi küm ishika tsüngda alima nung asayamung balala aser bilateral series balala asayatsü atema iba ya maongka kanga tajung lir.

"Ni mapa tenzüktsü matateter. Iba mapang ya jangrademtsüka, tayongzükba ka aser ajak atema maongka kanga tulu lir," ta paisa shisem.

## WFI-i wrestlers 30 khen atema suspend sütsüogo

**Aami/June 7, 2025**

**(Agencies):** Taoba ita tsüngda ken o 4000 dak tema asadangba sülen Wrestling Federation of India (WFI)-i junior-level asayamungtem nungi overage wrestler 30 suspend sütsüogo.

Delhi nungi coach aser wrestler temi Haryana nungi wrestler tem aikati junior-level asayamungtem nung asayatsü atema birth certificates taila yanglur ta ashishiba sülen iba jenjang ya agia liasü.

Overage wrestler anati tawa Bihar nung Khelo India Games nung medal anabo nguogo. WFI ketdangsür tejen kati ashiba agi, "onoki wrestler tem career meraksatsüner, anungji onoki parnok U18 aser Cadets amala junior-level asayamungtem nung dang shilemagitsü tenokdangba agütsüogo. Arishi küm 18 temapur senior level nung pei state nungi asayatsüla."

Suspend sütsüo aliba wrestler temi parnok tanaben asayatsü asoshi tatok meshitsüla aser parnoki aibelenba nangzüktsüla. WFI-i ashiba agi, aibelen 30 shi taoba anogo 30-40 tsüngda suspend sütsüogo, shirnok timba Haryana nung parnok coach temi anisa-a Delhi indang Narela aser Rohini zone



tem nung ketdangsürtem nem sübokrem agütsür birth certificate taila agizüka liasü.

"Ken o 436 nungi 300 shi Narela zone nungi liasü aser tanungba ya Rohini zone kübok Sultanpuri aser Mangolpuri nungi liasü. Item wrestler tem yagi Delhi nungi asayatsü atema Begampura nungi certificate taila agizüka liasü, kechiyong Haryana team nungi asayatsü atema shimtsü kanga tasak lir. Tashishiba balala benokba sülen onoki MCD aser Delhi Cantonment Board den ken o jangjashi aser certificate tem ya taila ta jangja liasü," ta ketdangsür yagisa shisem.

Ketdangsür yagi iba jenjang agiba nung coach tem shilemagitsüogo. "Coach tem dak tai tongloktsütsüla, kechiyong parnoki tenung tajung agitsü atema pa kübok asayatem nem medal ngudaksüner aser iba ajanga overage asayatem junior level nung asayadaksür," ta pai ashi.

WFI-isa, birth certificate taila agütsüba atema tetsür wrestler ka indang osang Khelo India Games Technical Committee nem agütsüogo. Tetsürla yagi Delhi Cantonment Board-i agütsüba certificate ka benok, saka asadangba sülen Board-i iba certificate magütsü ta shia liasü.

Ketdangsür yagi ashiba agi, wrestler temi cyber cafe kiburtem nem sen agütsür parnok indang certificate tem nung bar code taila inokdaksür, koba scan asüba mapang shitak ama dang angur. Iba amala inyakyim nungi jenboa alitsü atema WFI-i, tawa agütsüba birth certificates tem magizüktsü telemtetba agiogo.

Kasa mapang nung Khelo India Games mapang sexual harassment indang tashishiba ka angazükba sülen WFI-i Haryana coach Sanjay Lather mapa nungi anentsüogo.

"Tashishiba nung ashiba agi, state sorkari shimba coach yagi tetoktepba tembangba sülen tetsür wrestler tem indang takdangi ia liasü. Internal Complaints Committee-i ken o asadangogo aser pa taküm tepeyong wrestling dak sendakba inyakyim kecha nunga shilemagidaksütsü telemtetba agiogo," ta ketdangsüri ashi.

## **BILEMDANGANG**

**"Na kechi agi pelar aji tali inyakang."**